

Seppa lo participa den Dialogo Social si gobierno cambia actitud

ORANJESTAD — Sindicato Seppa ta tene porta un tiki habri ainda pa loke ta un posibel participacion den Dialogo Social riba topico di vitalidad. Lider di e sindicato di ambtenaar Magaly Brito ta duna di conoce na Bon Dia Aruba sinembargo cu pa Seppa sinta na mesa bek, gobierno lo mester muestra mas sinceridad.

Desde e Dialogo Social tocante hisamento di edad di pensioen di AOV, Seppa no a mira e pakico mas pa participa den e discusionnan mas. Esaki segun Brito pasobra gobierno a djis dal bay cu su punto y a hisa e edad sin mas. E sindicato no ta su so den esaki diferente sindicato a cancela nan participacion na e Dialogo Social y a manda un manifiesto na gobierno den cual nan ta exige entre otro un re-evaluacion riba con e Dialogonnan ta tuma luga y tambe atencion pa entre otro finanza publico y tarifanan di awa y coriente. Seppa tambe tabata un di e sindicatonan cu a briya cu su ausencia durante e celebracion recien di cinco aña di Dialogo Social. Brito su argumento pa esaki ta cla y raspa: "E pregunta ta

kico tanto tabatin di celebra."

Seppa normalmente ta participa na reunionnan cu gobierno ora ta toca ambtenaar so, asina Brito ta splica. Un di e topiconan den cual e sindicato tabatin hopi di contribui tabata esun di vitalidad, pues kico pa haci pa cu trahadonan cu por y kier sigui traha despues cu nan yega edad di pensioen. Eynan e lider sindical ta sinti cu kisas toch lo por tin un apertura pa participa. "Nos por pens'e." Si dicidi esey lo depende di un decision interno di Seppa. Pero mas ainda di cambionan den e manera di actua di gobierno. Lo por conta cu participacion di Seppa 'dia cu gobierno completo ta sigui e fundeshi di Dialogo', segun Brito, mustrandoriba e situacion den cual partnernan social lo a haya nan mes den dje unda cu un minister ta bay di acuerdo cu algo den Dialogo, pero e otro den practica ta hala kita y no ta cumpli cu e acuerdo. "Bottomline ta cu den Seppa no ta sinti sinceridad di parti di gobierno", segun Brito. Pa e motibo ey tambe gruponan di trabao den Seppa ta prepara su mes pa enfrenta y no mas pa hiba discusionnan,



asina e lider sindical ta duna di conoce, bisando cu e sindicato ta dispuesto pa enfrenta

'cualquier intencion contra e ambtenaar y contra e clase trahado su pan di tur dia.' □